

CM Rio-i gari lendong nung asür aser yirur nem senotsü teyari agütsür

Dimapur, February 1, 2026 (TYO): January 31, 2026 aonung Kohima district kübok 10 Mile aser Peducha tsüngda bus lendong atalokba atema temulung shiranger aser iba lendong asür kibongtem den asükhu lemsateper ta Chief Minister Dr. Neiphiu Rio-i ashi.

Chümoukedima Ao Baptist Arogo nung züngsem tajungtem asüba atema mang ayimer aser asür kibong shia nem Rs 2 lakh teyari agütsür ta CM Dr. Rio-isa ashi.

CM Rio-isa iba lendong nung kanga mejungi yirua alir shia nem Rs 50,000 teyari agütsütsü osang metetdaksüogo.

KOHIMA POLICE-I METETDAKTSÜR

January 31, 2026 aonung 8:10 ako meta 10th Mile Road, Kohima nung nija bus gari ka tsükokba osang sangoktsü aser iba osang angashili District Administration, Chiephobozou Police Station, aser Kohima Traffic Police tesem tonga ao, ta PRO, Kohima Police-i sangdong ka nung ashi. Iba nija bus gari nung

Chümoukedima Ao Baptist Arogo züngsem 32 mener lia tsükok ta osang jangjateta liasü. Lendong atalokdak bushisüngdang asüdang yi jemer anidang tsükokba masü saka mechanical timtem ka ajanga lendong atalokba ama reprangteto, ajisüaka technical examination ka inyakdar ta Kohima Police-i metetdaksü.

Iba lendong nung gari nung mena alir tetsür pungu asü aser parnok mang agiteta ozüng nung lateta aliba ama maparen ajak inyaker pei pei kibongtem ket nung agütsüogo ta parnokisa ashi.

Iba lendong nung teyirurtem Christian Institute of Health Sciences and Research (CIHSR), Dimapur-i anir oa anepalu.

Iba lendong sülen rescue & relief operations nung Northern Angami Youth Organisation (NAYO) aser Tsiesema Village Youths-i teyari tulu agütsüba atema parnok dang pelar aser tenüngsang agütsür ta Kohima Police-isa metetdaksüogo.

North East nung sorkar mapa inyakertemi OPS meshir



Dimapur, February 1, 2026 (TYO): February 1, 2026 nü ACTA Bhavan, Guwahati nung North East Leaders Meet for Restoration of Old Pension Scheme (OPS) senden menogo.

Iba senden nung North East state tem nungi service associations aser teshimtet nübotem aden aser parnoki sorkar mapa inyakertem asoshi Old Pension System (OPS) meyipa bener arutsü atema jembitep.

Senden nung National Pension System (NPS) ajanga tayongzükba bentsür aruba indang lemsateper aser Old Pension Scheme meyipa bener arutsü nüngdakba jembi.

North East region ajunga nung OPS meyipa bener arung ta state sorkartem aser Centre

sorkar dang külemi ashitsü atema senden nung adenertemi bangjemtepogo.

Iba maparen tajungba aser takangba nung inyaka aotsü atema North East Govt. Employees Welfare Federation kübok coordination committee ka tentetogo.

Iba committee ajanga sentongtem atongsü, maparen lemsateptsü aser sorkartem den jembitepa inyaksangshia aotsü.

Taruba North East Govt. Employees Welfare Federation sendenji February 14 nü Itanagar, Arunachal Pradesh nung amentsü atema lemtetogo.

Nagaland NPS Forum (NNPSGSEF) president Avizo Nienu aser finance secretary Adabe Namgi nati Nagaland tenüng nung

iba senden nung aden.

Nagaland NPS Forum-i Nagaland sorkar dang aiben OPS bener arutsü atema shiditem züluogo saka tang tashi nung telangzüba tajung kecha mali ta Nienu-i senden nung jembidang ashi.

North East ajungalen nungi lennirtem longjemtsüba kanga nüngdaker. North Eastern state tem nungi sorkar mapa inyaker ajak longjemtsüla, amalitep alitsüla aser ola ka dang adoktsüla ta paisa ayongzük.

North East state tem nung Old Pension Scheme meyipa bener arua metenzük tashi North East Govt. Employees Welfare Federation aser coordination committee-i mapa inyaksü ta metetdaksüogo.

Budget 2026 sülen jenjang melenshitsü



New Delhi, February 1, 2026 (Agencies): Union Finance Minister Nirmala Sitharaman-i February 1, 2026 nü Union Budget tibuba atongtepa benokogo.

2024 Lok Sabha elections nung takok ngua sorkar akümba sülen iba ya Modi 3.0 sorkar kübok full budget tanabuba lir.

Taküm budget nung agriculture, manufacturing, employment, MSMEs, rural development, aser innovation dena wadang tongti 10 nung rangloka lir.

Taküm Budget ajanga sports equipment dalangba akümtsü aser diabetes o cancer atema mozütem jenjang ajemtsü ta Sitharaman-i tanü metetdaksüogo.

Tanü Union Budget benokba sülen items kar dalangba aser kar tasakba akümba yamai agütsür.

Jenjang dalangba akümba: # Personal use imported goods

17 drugs or medicines for cancer patients
Drugs, medicines and Food for Special Medical Purposes (FSMP) for 7 rare diseases
Leather items (footwear)
Textile garments
Seafood products
Overseas tour package
Lithium-Ion Cells for batteries
Solar glass
Critical minerals
Biogas-blended CNG
Aircraft manufacturing components
Microwave oven
Foreign education
Jenjang tasakba akümba:
Alcohol
Cigarettes
Nuclear Power Projects components
Minerals, iron ore, coal
Misreporting of income tax
Stock options and future trading.

NSF ILRC-i ANTA nem tenüngsang agütsür

Dimapur, February 1, 2026 (TYO): All Nagaland Taxi Association (ANTA)-i parnok unit ajak dang Inner Line Pass (ILP) akangkanga benshitsü aser non-ILP holders meyaritsü tetuyuba agütsüba atema tenüngsang tulu agütsür ta Naga Students' Federation nung Inner Line Regulation Commission (ILRC)-i metetdaksüogo.

"ANTA-i iba tebilemtsü atema akangkanga noktakba ajanga Nagaland nung Inner Line Pass system shitak inyaksüla ta asüba tangatetba sayur. Iba ya Nagaland nung lisopurtem temetentem, maitsü aser

taginübatem kümzüka ayutsüba maparen nung shilem tajung ka ama Commission-i züngshir" ta ILRC-i ashi.

NSF nung federating units ajak aser iba tebilemtsü den sendaktepa alirtemi teti tenük yokba, awareness drives agiba aser district balala nung voluntary enforcement maparen inyakba atema tenüngsang agütsür ta parnokisa ashi.

"ANTA tetuyuba agütsüba sülen non-ILP holders kari Nagaland State Transport (NST) aser tanga public transport systems ajanga Nagaland telungi aittsü merangba osangtem angazüker. Ajisüaka ILP

maparen majangi aittsü merangbaji ozüng alema inyakba mapa ka aser odangbo metoktsütsü" ta ILRC-isa ashi.

Transport Department, NST ketdangpurtem, district administration aser ozüng amertemi bus terminals, railway stations aser public transport services indang boarding points nung ILP akangkanga inyaksü ayongzüker ta ILRC-isa ashi.

ILRC-isa ANTA aser federating units ajak nem tenüngsang agütsür aser Nagaland ajungalen ILP maparen akangkanga inyaka aotsü ayongzüker ta ILRC-isa metetdaksüogo.

Budget 2026-27 nung Northeast atema balaka melemzüksü

Guwahati, February 1, 2026 (Agencies): Union Budget 2026-27 nung Northeast asoshi connectivity, culture, agriculture aser strategic integration indang tenangzükbatem agiogo saka Ministry of Development of the North Eastern Region (DoNER) asoshi budget balaka melemzüksü.

Union Finance Minister Nirmala Sitharaman-i Budget onük jembidang Centre sorkari Purvodaya States aser North-Eastern Region nung temulung agütsüba ashi.

Budget 2025-26 nung DoNER nem Rs 5,915 crore lemmzüksü aser iba ya Centre sorkar total expenditure Rs 49,64,842 crore nung 0.12% shi liasü.

Budget 2026-27 nung

DoNER nem Rs 6,812.30 crore lemmzüksü saka iba ya overall budget Rs 53,47,315 crore nung 0.13% shi dang lir.

Northeast asoshi senbo teimba lemmzüksüogo saka Union Budget nungbo 0.10% den tera agi dang teimba dang lemmzüksür.

Union Budget 2026-27 nung Agriculture kanga tongti süa benoka lir. "North East nung Agar süngdongtem yaritsü" ta Sitharaman-i ashi.

Laisa India kübok tangalen cocoa, cashew aser nuts amala jenjang aketba tsünusenbongtsütem den agarwood economy kasa züngshiba metetdaksüogo.

"North-Eastern Region ya Theravada aser Mahayana/

Vajrayana sobalibatam adokdak lir" ta Nirmala Sitharaman-i shia Arunachal Pradesh, Sikkim, Assam, Manipur, Mizoram aser Tripura nung Buddhist circuits renloksü atema scheme tasen ka tenzükba metetdaksü.

Iba scheme kübok monasteries aser temples wazüka ayutsü, connectivity aser pilgrim amenities tajungba akümtsü aser India spiritual tourism map nung iba tesem dendaktsütsü.

Union Budget nungsa Tezpur nungaliba National Mental Health Institute jenjang ajungkettsü metetdaksüogo. Iba ajanga Assam ya national mental healthcare map nung dendaktsür aser Northeast nung specialised services nung temulung agütsür.

ARTC&SnungAttestationParadeagia sepa 282shimokogo



Maj. Gen JS Bainsla, SM, Additional Director General of Assam Rifles, Officers, staff aser AR nung tasen shimokba sepa 282 külemi tangokba noksa ka yangi angur.

Dimapur, Tsüklai/February 01 (TYO): Assam Rifles Training Centre and School (ARTC&S), Sukhovi, Chümoukedmia nung January 31, 2026 nü Attestation Parade agia Assam Rifles nung anioka liasü.

Tetsür 36 densema sepa tasen 282-i hopta 44 training agia aruba tembanga iba special attestation parade nung shilem agi.

Iba training nung battle craft, hadir amshiba, jungle lane shooting, counter-insurgency operations awajema liasü. Parade ya Captain Anjali Kirola-i anir liasü.

Sepai tasentem den Maj. Gen JS Bainsla, SM, Additional

Director General of Assam Rifles-i jembidang, Assam Rifles ajanga linük kumzüka ayuba nung shilem balala agiba indang lemsatepa liasü.

Paisa Rifle women temi shilem tajung agiba indanga lemsatep, shirnok 2015 nungi frontline duties nung anioka shilem agia arur aser North East nung kisüng masü saka Jammu & Kashmir, United Nations Missions, aser 2019 & 2023 nung Republic Day mapang shilem agiba indang ashi.

Frontline nung tetsür sepaitem aliba ajanga security tashi itshir ta ashi.

Maj. Gen JS Bainsla-i parnok

dang yimya tajung nung bendanga agütsür linük tenzüksü aser technology melenshia aoba sülen anidaksü ayongzüka liasü.

Tang shimokba sepaitem ya operatonal sector balala nung pei unit nung adentsü.

Pai sepaitem aser parnok tsürabortem nem tenüsang agüja liasü.

Iba sentong nung Overall Best Recruit (Best in Physical & Firing) sempet GD Appu Chakma nem agütsü, Overall Second Best Recruit sempet GD (Mahila) T. Maloti Devi nem agütsü aser Best in Drill sempet GD Bikash Mandal nem agüja liasü.

Kiphire nung Sampoonnata Abhiyan 2.0 tenzük

Dimapur, Tsüklai/February 01 (TYO): Aspirational District Programme aser Aspirational Block Programme of Sampoonnata Abhiyan 2.0 tenzüka sentong ka DPDB Conference Hall, Kiphire nung January 30, 2026 nü ADC Kiphire, Longdiba L Sangtam sentong akhumdong sür agia liasü.

Longdiba Sangtam-i iba sentong nung jembidang, danga district tem nung Sampoonnata Abhiyan 2.0 ajanga mapang shidak nung service agütsüba osang lir ta ashi.

Anungji Kiphire Aspirational District aser Block-ia kanga yakyaka shilem agia frontline workers temi outreach sentong tashi itshidaksütsüla, ta ashi.

Sampoonnata Abhiyan 2.0 kübok Kiphire Aspirational

Block yagi health and nutrition, education aser sendaktepa aliba atema inyaksü. Yangji ICDS kübok Anganwadi centres nung tanur atema mapang shia supplementary nutrition agütsütsü, metzü meshiba aser tajemtsü tzü agütsütsü, school nung tetsürtem asoshi metzü meshiba tesem teperi agütsütsü aser mamatzü agütsüba shiruru nem vaccination shidak agütsütsü dena lir.

Iba Abhiyan yagi grassroots governance tashi itshitsü, jang-o-tzü tekeraba angutsü aser terenlok mapa tekeraba nung inyaksü.

Iba den külemi maparen balala inyakba documentation shidak bendena terenlok osang mapang shidak nung agütsütsü.

2018 küm Aspirational District ka ama aser Aspirational Block

ama shimba ya asen district asoshi kanga tia taka lir, ta pai ashi. Linük nung meta talang nung aliba district aser dangar memenepba nung ajemdaker iba Aspiration ya shim.

Sentong nung Chief Medical Officer, District Education Officer, DPO, Social Welfare Department, Chief Veterinary Officer, aser Area Coordinator NSRLM, RD, Khongsa nung temia jembia liasü.

Sentong tenzüka Khiungmong, HA, DC Office Kiphire ajanga sarasadem aser Takatemjen Pongen, EAC & Nodal Officer, ADP/ABP Kiphire ajanga pela agizükba o jembia liasü.

Iba sentong nung Ningsangwu, ABP Fellow Kiphire menden liasü aser Kato T. Aomi, EAC Kiphire ajanga melepzüng o jembia liasü.

Chümoukedima nung Telecom Cyber Security awareness agütsü

Dimapur, Tsüklai/February 01 (TYO): Department of Telecommunication (DoT), Nagaland, NE LSA ajanga January 30, 2026 nü CIHSR, Chümoukedima nung "Telecom Cyber Security, EMF Radiation Myths & DoT's initiatives on Citizen Centric Services" indang awareness sentong ka ayongzüka liasü.

Iba sentong ya nüburtem nung cyber frauds tasa balala indang angatetdaksütsü, EMF radiation myths aser DoT ajanga Citizen Centric sentong balala ayongzüka tajungba nung angatetdaksütsü nükjidong nung ayongzü, kong kaketshir, tesayur aser ketdangsür 300 shi dena liasü.

Mobile phones, emails mesüra laptops amshia cybercriminals temi tasa balala amshiba indang awareness agütsütsü nükjidong nung iba sentong ya ayongzü.

Iba sentong nung adener nem 'phishing, identity theft, malware attacks aser social engineering scams' amala yimya balala ashikülaker temi amshiba indang angatetdaksü.

Department of Technology (DoT) ajanga mobile subscribers nem tashi tali agüja security awareness tali ulushitsü nükjidong nung yangluba Sanchar Saathi portal indanga lemsatep.

DDG Nagaland, DoT ajanga sentong nung jembidang Nagaland nung Telecom Services indang osang lemsatep aser cyber frauds atema awareness agütsütsü nüngdakba indang ashi.

ADET, DoT Nagaland ajanga Cyber frauds, EMF Radiation Myths & DoT's initiatives on Citizen Centric Services indang tejangja rasaa ashi.

Iba sentong nung Medical Superintendent, CIHSR aser

Principal, NERMPI ajanga item onük nung parnok tangatetba lemsatepa liasü.

Sanchar Saathi ya mobile communication aser sorkar sentong balala dak sendakba nung nüburtem nem angatetdaksüba sapang ka amai lir.

Iba portal nungya mobile amshir temi Report Suspected Fraud & Spam communications, Know number Mobile Connections (TAF COP), samaba/ayaba mobile block asütsü atema osang agütsüba, Fraud International Calls indang ashiba densema nüngdakba balala agütsür.

CEIR (Central Equipment Identity Register) module ajanga samaba/ayaba mobile devices tsüngsü apuba nung yarir. Ajidang masü telecome operators ajunga nung ayaba/samaba mobile devices tem block asüba nung yarir. Nagaland nung CEIR sapang ajanga mobile phones 923 block süa lir, mobile phones 668 tsüngsü puteta lira ser mobile 119 nguteta lir.

TAF COP module ajanga mobile subscriber-i pa/la tenüng nung mobile connections agia aliba number tem repringteter.

Report Suspected Fraud Communications (CHAKSU) ajanga nüburtemi call, SMS mesüra WhatsApp ajanga menüngdakba osang aruba metetdaksür.

Sanchar Saathi portal indang tali jangjatsü atema nüburtemi <https://sancharsaathi.gov.in/> nung repringtetsü.

Sentong nung adener nem National Cyber Crime Portal (<https://cybercrime.gov.in>) aser 1930 helpline number indanga angatetdakja liasü, kong cybercrimes osangtem agütsüteter.

Manipur: Ukhrul nung NH-202 mokdangtsü amokmerener

Imphal, Tsüklai/February 01 (Agencies): Manipur nung Ukhrul district kübok highway ulushiba maparen anendaka aliba renema inyaksü aser iba lenmang yangluba agi kongshiba kibongtem nem land compensation magütsü aliba agüjang ta takhangba agüja Hungpung, Shangshak Phunghon, Shangshak Khullen aser Hatha yimtsüngtem nungi nüburtemi February 4-4, 2026 anogotem National Highway-202 mokdangtsü amokmerenogo.

Iba lenmang renemtsü menuba ajanga tongtipang lenmang kanga mejungu yutsür, anungji iba takhangba agütsüba mapang Finch Corner aser Choithar Junction tsüngta NH-202 ya jungjunga shibangtsü, ta yimdaklir temi ashir.

Yangji alirtemi ashiba agi,

project anendaka aliba aser compensation ken o mebenteti aliba nung tekeraba nung mera agütsü khanga parnoki Ukhrul Deputy Commissioner nem January 28 nü tenzüla ka agütsü. NH-202 ulushiba maparen ya 2018 nung tenzüka, Finch Corner-Choithar Junction nung terenlok mali ta parnoki ashir.

NH-202 ya Ukhrul district asoshi takum lenmang ka lir, koba emergency healthcare, shishilempaba, shisaluyim aser anogoshi oli-oratsü atema iba highway ya tongtipang ta parnoki ashir. Land acquisition maparen tembangaka ali kibur nem compensation ano magütsür.

Package-3 aser Package-4 kübok mapa anena lir, aser iba yongji lenmang tamajungba kumdaksür ta ashi.



516buba Biswa Mahabir Chilarai Divas sentong Pipora Dookan, Darrang district Deobarnü agiba nung Assam Chief Minister Himanta Biswa Sarma dena liasü. Iba sentong ya Directorate of Cultural Affairs, Government of Assam ajanga Darrang district administration, Koch Rajbongshi Development Council aser All Assam Koch Rajbongshi Sanmilani lungjemer ayongzüka liasü.

Finance Minister Nirmala Sitharaman-i Union Budget benok



New Delhi, February 01, 2026: Amongnü Union Finance Minister, Nirmala Sitharaman-i Union Budget benoktsü atema Parliament-i aotsü lia la den Minister of State for Finance, Pankaj Chaudhary aser Ministry of Finance nung ketdangsertem tangokba noksa nung angur.

New Delhi, Tsüklai/February

01 (Agencies): Amongnü Lok Sabha senden nung Union finance minister, Nirmala Sitharaman-i ghonda ka ser minute metsür-pongu agia Union Budget 2026-27 benokogo; tang agi lai 9benbuba budget benoker.

2026-27 kümsük atema budget nung lai income tax, defence, railways, MSMEs, healthcare aser aluyimba densema sector balala indang budget metetdaksü.

Budget benokba sülen la nem tenüsang agüja Ato kilonser, Narendra Modi-i, iba budget ya 2047 küm tashi nung Viksit Bharat nükjidong ataloktsü atema lir, ta ashi.

Union Budget nung Defence Ministry atema sen 7.85 lakh crore lezmüksü (yaküm 6.81 lakh crore lezmükja liasü). Iba nungjagi sen 2.19 lakh crore bo armed forces modernization atema asütsü, aser iba nungji tayimtsü aser engine nung sen crore 63,733 aser Navy atema sen crore 25,023 densema lir. Tanüngba sen 5.54 lakh crore nungjagi pension nung sen 1.71 lakh crore aser tanüngbaji nüngdak balala atema lezmüksür.

Budget nung Railways atema sen crore 2,93,030 lezmüksü. Mumbai-Pune, Pune-Hyderabad, Hyderabad-Bengaluru, Hyderabad-Chennai, Chennai-Bengaluru, Delhi-Varanasi, aser Varanasi-Siliguri yimitem sendakteptsü atema high-speed rail corridors tenet benoka lir. Laisa West Bengal kübok Dankuni aser Gujarat kübok Surat na sendakteptsü atema freight

corridor ka sangdong.

April 1 nungi tenzüka Income Tax Act, 2025 mapa küma benoktsü. Iba Act ajanga küm 60 dak tema benshia aruba özüng tejenba melentsü.

Budget nungsa Odisha, Kerala, Andhra Pradesh aser Tamil Nadu ama ali nungi adokba rongsen aika aliba state tem nung rare earth corridors amenoktsü atema benokogo. Yaküm November ita nung tenzüka 'Scheme to Promote Manufacturing of Sintered Rare Earth Permanent Magnets' nung ajemdaker corridors amenoktsü atema sen crore 7,280 lezmüksü. Iba scheme kübok linük nung integrated REPM manufacturing capacity ji küm shia 6,000 metric tonnes adokdaksütsü nükjidong lir.

Budget nung Union health ministry nem sen crore 1,06,530.42 lezmüksüogo, aser ibaji yaküm budget den medemdangra takümbo shilem 10 agi tali lezmüksüba lir. Finance Minister, Sitharaman-i medical tourism ajungkettsütsü atema regional medical hub pongu amenoktsü benok. Tang aliba healthcare institutions upgrade sütsütsü aser tasen-a aika amenoka taruba küm pongu tsüngda lenla 10 nung nisung lakh 1 nem training agütsütsü. Ano India ya Biopharma tiyongtsü tesem ka akümtsü atema sen crore 10,000 lezmüksütsü, clinical trial sites 1000 amenoktsü aser Central Drugs Standard Control Organisation tashi itshitsü.

MSMEs ajungkettsütsü atema Finance minister-i asalentong asem benok, aser iba nungji 'MSME Champions'

adokdaksütsü atema sen crore 10,000 benokba densema lir.

Budget onük jembidang lai, Modi sorkari mapa adokdaksütsü aser rongsenkettzüng aintsü atema temelenshi aika benoker, ta ashi.

Anüdoklen aliba state tem nung shisaliok jenjang ajungkettsütsü atema National Institute of Design amenoktsü, industrial corridors anasa university townships pongu aser STEM kaketshirtem atema district shia nung tetsürtem hostel amenoktsütsü aser Astrophysics research atema telescope facilities amenoktsütsü.

Finance Minister-isa school tem aser college shia nung content creator labs amenoktsütsü atema benokogo.

Aluyimba sector dak sendakba nung Finance Minister-i oshi balala nung AI hadir 'Bharat Vistar' tenzüka AgriStack portals aser ICAR nung advanced AI systems amshitsü.

Taruba küm 10 tsüngda linük nung saisapong sector ajungkettsütsü atema Union Budget 2026-27 kübok finance minister-i Khelo India Mission sangdongogo aser iba Mission kübok saisapong sempet alirtem jangjatsü, coach training agütsütsü, sports science aser infrastructure terenlok atema inyaksü.

Union Budget nungsa Census 2027 atema sen crore 6,000 lezmüksüogo. India nung 16buba Census ya 2021 küm agitsü liasü, ajisüaka coronavirus wara ajanga küm aika thinena aruba sülen taküm April 1 anogo nungi tenzüksü.

India-i Palestine maneni pusemtsü: PM Modi

New Delhi, February 01 (Agencies): Amongnü Ato kilonser, Narendra Modi-i Palestine foreign minister, Varsen Aghabekian ajurua senden amenba mapang nung pai la dang, India-i Palestine nunger maneni pusemtsü, ta metetdaksü.

Paisa, India-i Gaza nung yimjung asalentong densema yimjung atema inyakba maparen ajak pusemer, ta metetdaksü.

2buba India-Arab Foreign Ministers' senden nung adentsü atema Arab linüktem nungi Foreign Minister tem India-i arua lir aser Amongnü Varsen-i Modi ajuru.

India-Arab Foreign Minister tem senden nung India external affairs minister S Jaishankar-i, kiralongrartemi timtem agütsüba linüktemi peisasa pei kümzüksü atema inyaksü temeden lir, ta ashi.

Modi-isa Varsen dang, region nung yimjung atema Arab League-i tongtibang shilem agibaji India-i pelaa agizüker, ta ashi.

Modi-i X ajanga, "Arab lima ya India nunger atema kiyonger ka amai lir, akhidang nungi tesendaktep lir, nüburtem tsüngda tesendaktep lir aser adianu ama temeimtep lir. Iba denji külemi yimjung aser

terenlok atema amalitepa inyaker. Technology, energy, shishilembaba aser tasen purateta inyakba tsütsü amalitepa inyakba ajanga maneni maongka tasen aika angutsü aser tesendaktep jenjang tajungba akümtsü," ta metetdaksü.

Gaza nung nüburtem timtemba dak sendakba nung Palestine foreign minister, Varsen Aghabekian-i Modi dang, international özüng kübok Palestine nunger temeden atema India-i pusemba onoki pelaa agizüker, ta ashi.

External affairs ministry-i ashiba agi, Ato kilonseri tarutsü nung India-Arab partnership atema pa mangdang lemsatep aser shishilembaba, investment, energy, technology, healthcare aser sector aika nung amalitepa inyakba ajanga telok ajak tajangzüker angutsü ta shiogo, ta metetdaksü.

"Terenlok tsütsü India ya mapang talangka nungi Palestine den partner lir. Ibaji linük ana tsüngda inyaker aser UN agencies ajanga-a inyaker. Tang tashi nung India-i dollar sen million 170 shi jenjang teyari agütsüogo. Iba nungjagi tang dollar sen million 40 shi jenjang projects teinyakdak lir," ta osang ka ajanga metetdaksü.



New Delhi, February 01, 2026: Amongnü Rashtrapati Bhavan kima linük Tir, Droupadi Murmu-i Amrit Udyan Winter Annuals Edition 2026 lapoktsüba sülen tangokba noksa nung angur.

Trump-i maneni asenok nem osangtsüsang agütsür: Jairam Ramesh

New Delhi, February 01 (Agencies): US Tir, Donald Trump-i, India-i Iran dang nungi masü saka Venezuela dang nungi totzü alitsü, ta sangdongba nung ajemdaker Congress party-i Narendra Modi-i aniba sorkar sashia aitsüogo.

Congress general secretary in-charge communications, Jairam Ramesh-i X ajanga Trump-i jembiba 'audio' ka lemsatep.

Congress leniri, "Pai (Trump) asenok dang Operation Sindoor anenogo ta metetdakja liasü. Pai asenok dang, India-i Russia dang nungi totzü aliba anenogo ta ashi, aser tang pai ano osang tasen asenok nem metetdaksür," ta ashi.

Ramesh-i X ajanga, "Tir

Trump-i maneni asenok nem asen sorkari kechi inyak mesüra kechi inyaksüar metetdaksür," ta ashi.

Congress-isa, kechiba item ama osangji India sorkar nungi masü saka bendanger sorkar lenir ka nungi ang sangdonger?, ta asüngdang.

Air Force One tayimtsü telung nung osangbener den jembidang Trump-i, "China-a pelaa agizüker aser onoki totzü dak sendakba nung telemtetba agitsü. Onoki China pelaa agizüker," ta metetdakja liasü.

Trump-isa, "Onoki tezüngzüktep ka agiogo. India-a adentsü aser parnoki Iran dang nungi masü saka Venezuela nunger totzü alitsü," ta metetdakja liasü.



February 01, 2026 nü New Delhi nung Union Finance Minister, Nirmala Sitharaman-i Parliament nung Union Budget benokba mapang Confederation of Indian Industry (CII) Tir, Rajiv Memani, CII Steering Group on Health & Healthcare Council Chairman Naresh Trehan aser tangartemi TV screen tulu nung reprangdang tangokba noksa nung angur.



TIR YIMYIM YIMOBILEM (EDITRIAL)

DIMAPUR MONDAY, FEBRUARY (TSÜKLAI) 02, 2026

Onoki aibelenogo!

Asenok Ao kin tenüing nung Ao Baptist Arogo Mungdang aser Ao Senden lenirtem dena January 31 nü Mokokchung town nung ghonda 6 lumia Aotsür Aortemi Tsüngrem anema tai temenen menaba nangzüka sarasadema amungbaji, asenok Ao kin tia ajung, asenok samatsü melen Tsüngrem taochi agi, ano khen, asenok tai temenen Pa tsüngdang nangzüksüsa Tsüngremisa taochi mapang ka agütsüba lir ta asenoki angateter. Ajisüaka, iba taochi mapang ya asenoki Mokokchung town nung January 31 nü ghonda 6 lumia asenok lenirtemi anir asen kin tenüing nung sarasademba mapang aser mapa to tatembanga ta mebilemli, saka ano asenoki mengujemba aser mebilemtetba temenentem aika anünga alitsü, anungji Tsüngrem anema menaba temenentemji ngujemtsü aser bilemtettsü asoshia Tsüngrem taochisa nüngdaksü. Aji oda, ashiko, yakanü tashi nung asenok lokti külemi Tsüngrem dang asenoki menaba tai temenentem nangzüka sarasademmer asünungji, asenok kija shiai 'ni menaba' tai temenen ta masü saka 'onoki mesüra ozü kini menaba' tai temenentem taidokang, 'onoki aibelenogo' ta dang shia alitsüa akok. Iba jagi temang telong nung aliba tashidak memetet aser mamshi ser tema nung dang mimshir yutsü amai asütsü. Ibaji bilemdanga, ano maneni Tsüngrem dang taochi meshia asenok Aotsür Aor shiai onoki aser ozü kini ta kisüing masü saka tangbo 'nie menaba tai temenentem' kü dang taidokang ta asenok kija shiai pei temenen nangzüksü kanga nüngdaka kümogo, kechiyong asenoki Tsüngrem dak amangba yabo telok aser kin mapa masü saka kija mapa lir. Aji oda, kotakia aser molumia telok masü saka asen kija tamang aser mapa ajanga dang aotsü. Ano, tanü asenok alima nung alidang, Tsüngrem nungi taidok angutsüsa inyaksüba tongtibangba mapa kaji, asenoki tangar dang 'ni aibelenogo, onoki aibelenogo, taidokang' ta shitettsüla. Aji oda, asenoki Tsüngrem aser nisung anema tai mena, saka Tsüngrem tsüngdangbo asen tai temenentemji nangzüksü saka nisung tsüngdangbo menangzüktet ta süra, ashiko, Tsüngremi asen tai temenentemjia metoktetsüa akok, kechiyong Tsüngrem nungi asenok taidok angutsü atema tamasa asenoki tangar danga taidok meshitsüla aser taidoka agütsütsüla. Ibaji Laishiba tetuyuba lir. Ibaji kodang bilemdangdir, asen Ao kin aser asenok Aotsür Aortem, talisa Nagaland nung alirtem asoshi, asenoki aibelenbatem Tsüngrem dang nangzüksü kisüing yagi meperitsü saka asenoki Naga nungertem dang 'Onoki aibelenogo, onok dang taidokang' ta yimjak nung taidok meshitsü nüngdaka lir ta angateter. Iba o ji asen bang nungi adoktsü atema asen kin kolok aser shisatsü nung tangar kolok alemdanga oa angatetba tangatetba shisatsü aser tasü tait tanela aser temulungjang ka nüngdaksü, kechiyong nisung asoshi tangar dang 'ni aibelenogo, kü dang taidokang' ta ashitsübaji kanga tasak mapa ka lir. Atangji, asenoki Tsüngrem dangbo ni aibelenogo, kü dang taidokang ta melamelaa shiteter, kechiyong Tsüngremji asenoki mangur aser tangari aji mangashir. Iba jagi Tsüngrem dang melamelaa taidok nangzükli aser melamelaa raksali asür. Atangji, tanü asenoki Tsüngrem dang asen temenen nangzüksü ya asen kija ajungtsü asoshi masü saka Naga lima jungnüba agi temelenshi tajung ka imlaa inyakba lir, kechiyong Nagaland ya Ao kin jungra, tangar kintema ajungtsü. Aji asüküm o masü saka khuret abenba o aser asenok taküm nung ajangshiba shitakba ochi o lir. Iba tangatetba nung Tsüngrem taochi agi Par santem mesütsü shimtetba tenzükertem Tsüngrem dang lumia temenen nangzüksü sentong ayongzükyogo aser ano maneni ayongzükyonga aotsü imlar. Iba ama taochi mapang ka asenoki ajurudang, ano yimten aser lokti tsütsüa Ao Senden anir Aor yimsüsürtemi Naga nungertem dang 'Onoki aibelenogo, onok dang taidokang' ta yimjak nung shitetlasang, Naga nung asoshi shitakba puteppshiba aser Naga lima yanglushiba mapang aser mapaji yang nung jagi tenzükla ta bilemer.

OLEMSABANG

TAMADOKBAJALA

~ Temsükala

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Shilem Pungu (5)

Kodang Aienla Class 10 atong, par tesayuri jokola lai matric pass mesütettsü anungji la matric magütsüdaktsütsü ta lemtet saka tesayur ka liasü, la tenung Ma'am Ajung liasü lai Aienla dak temulung alem nung lai Aienla matric tatidang agütsüdaktsünü nung lai parnok kulem tesayur dang Aienla tanu asüngbo meranga bushitar ta shia Ma'am Ajunglai mepishia Aienla matric tatidang agütsüdaktsü. La asoshi mezüngbuba la dak tamang akaba nisung ka lir ta la mulung anisungzüksü aser amang sangwa metitemi lai lesson meranga bushia la matric exam nung takok angu. Tangar ama temaba jenjang nung menguaka la 2nd division nung pass asü aser la asoshi aji hon taribi ka ajangzüksü amai liasü. Lai la marksheetji bener tenük nungi nüktzü alua Ma'am Ajung dangi bener oa sayu aser la dang yamai ashi "Ma'am tanu ni kechi jenjang nung lir aji na ajanga, nai kü dak tamang ayuba atema kanga pelar" ta shia tena pelatep.

Shilem Terok (6)

Aienla tebu kümisa küm yi jema aliba tu jokola tashi miti kuma temang nung timtem aika agi asüng aser shiranga dok. Pa temesen aser tezüngjang ajak raksa aser jokola anogoshia kidang dialysis agitsüsa aküm. Sensaker asünung sen maka saka Aienla kubo dang jungerbo ni meranga inyaka kubo anepalutsü ta sür lai anogo shia sü ara ayok, yamaji tetsü tenati tangar kidang nungi sen interest nung apua yamaji tebu treatment balala asoshi agi. Tebu jokola yipten nungi madoktet paralyze kümadok. Küm tenet tashi scü, natsü ajak yipten nungi dang masotet yamaji küm tenet shi ka kangshir kulen, aonung ka tebu kinungtsü aser tanur asemprongla aja aser ajak mendaktsü aser Aienla dak rangloka ashi "Obala kanga tai asü, Na ajak rongnung tashi tulutila, obala tenük tapok liasü saka dangbo ni ajak angur jala Aien Obala nem tatok agüjangma" ta tebu ashidang Aienla tenük nungi nüktzü alu aser la teka atentena la ola tanep jagi Oba ta adok aser lai ashi "Tsürapuri pei chir asoshi tajungtiba inyaker aser oba nia na asoshi tajungtiba inyakogo ta ni amanger." Yamaji sür kulen tebu tanubusang ana dang yamai ashi "Kü jabaso Imtiba aser Atuba, nena Oja aser Oya tena akhüm nung tashi anga liang aser oba ama kodanga teküma nu" ta ashi aser tatem nung Pa kinungtsü dang ken number 339 lapoka kulemi tenti ta ashi aser iba kenji Aienla anir par kinunger ajak tena ken tatem den külemi tebu taküm alima nungi pila.

Shilem Tenet (7)

Tebu sür kulen Lar kibong kanga mejungi aküm. Imtiba yi shia arua tebu tsüngsü nung jaja aser tenu Atuba kanga mit majung den kulemi züktepba auya len senzü.

Aonung ka police-i Atuba handcuff sütsü. Aienla amang nung aiür la kija police station jagi atu aser tenu atema tatok meshi aser sen meyirjang pungu (5000) bener bill sütsür tenu jail nungi aniok. Tetsü kanga dang teimla maka Aienla dak jenok. Mapang ka amadokba jala shiba kecha meinyaktettsü ta bilem, iba jala tu kibong asoshi tongshi ka aküm.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Cambodia nung Love Siem Reap Fest nung nisung 27,000 aden



January 25, 2026 aonung Cambodia linük nung 'Love Siem Reap Festival' nung sayutsüngir, Franklin Graham-i Tsüngrem O jembidang tangokba noksa nung angur.

February 01, 2026: Cambodia linük nung Billy Graham Evangelical Association (BGEA)-i ayongzükba 'Love Siem Reap Festival' nung nisung 27,000 shi aden.

Nütsüng 250,000 aliba Siem Reap yimti dang ya 'Center of Silk Industry' taka ajar. January 24-25 anogotem nung iba sentong agi aser tatembangbuba aonung sayutsüngir, Franklin Graham-i Cambodia nungertem dang, "Nenoki Yisu Khrista nüngdaker. Tsüngrem ajurutsü atema Pa (Yisu) dang lenmang," ta ashi.

Taoba mapang Siem Reap Airport nung iba sentong agi, aser tatembangbuba sentong nung nisung 12,000-i Kibur Yisu 'Preah Yesoo' ta tsüngsangtepa ken aten.

Graham-i, "Pai nü tenüng meteta dang lir. Pa atema na kanga tongtibang," ta ashi.

Tamil Nadu nung Good Friday ya 'dry day' asütsü akhanger

February 01, 2026 : Tamil Nadu nung Arogo dak sendakba organisation kati state sorkar dang Good Friday anogo ya 'dry days' nung züngoktsü takhangba agütsü.

Amalorpava Maathaa Mathuvilaku Saba telok yagi yi anema nokdaker. January 27 nü parnoki state sorkar nem legal notice ka agüja Good Friday ya 'dry days' nung züngoktsü takhangba agütsü.

Tamil Nadu nung 'dry days calendar' nung tongtibang national anogotem aser yimsü dak sendakba benjung anogotem densema lir, ajisüaka Good Friday bo züngoka mali, aser ibaji ozüng kübok ajak kasa züngshiba anema lir, ta parnoki metetdaksü.

Tuticorin diocese nung aliba telok ya 1912 küm Uvari yimdak tenteta liasü, aser iba telok yagi yi ajemba ajema akümtsü atema inyakba den külemi loktiliba nung tebilemtsü onük balala

Graham-i, "Asenok melungjang nung tazüngla lir aser ibaji Tsüngremi dang süngtsütettsü. Iba tazünglaji asüngtsü atema taonung nai Yisu Khrista agizükang. Pai nü taküm azüoktettsü," ta ayongzuka liasü.

Iba sentong nung adenertem rongnung Lihuor densema liasü. Teyi-i iba sentong nung adentsü atema pa ajungshia liasü. Graham-i lokti dang tejakleni arua Yisu agizüktsü tayongzükba agütsüdang Lihuor-a sabangleni ao.

Lihuor-i, "Ni kanga menor ang aru, ajisüaka ni tejakleni oa apudaksü atema kü melungjang nung tajungshiba liasü," ta metetdaksü.

Sabangleni oa Yisu nem bendanga agütsürtem rongnung Lihuor tebu-tanubo, Samrass-a densema liasü.

Samrass-i, "Kü taküm nung

timtem aika lir, anungji itemji bentettsü atema ni Tsüngrem jaok. Ni tangbo temelung pungba-a kümogo," ta metetdaksü.

Kasa sentong nung Motchoun-ia Khrista agizük. Pa lanuwa asüdang nungi Tenla kidangi oa intet, ajisüaka pa Thailand-i aoba sülen pai Tsüngrem nungi pilaa liasü saka iba sentong nung adenba mapang pai tanaben Tsüngrem temeim bushi.

Open Doors World Watch List nung India jenjang 12buba kümogo

February 01, 2026 : Alima nung Khristantem alitsü atema linük tamajungtiba 50 rongnung India jenjang 11buba nung liasü, ajisüaka tang tesüsabuba list nung jenjang 12buba kümogo (Open Doors' World Watch List 2026).

Iba report apibo India nung Khristantem atema tensa tajungba akümer ama sayur, ajisüaka Arogo nung lenirtem aser meimchir temeden atema inyakertemibo, ibaji ajanga linük nung Khristantem reshikangshiba nembangtsür, ta ashir.

Iba List nung India jenjang ka ajema kümogo, ajisüaka reshikangshiba score bo kasa dang (score 84) lir.

Open Doors-i, India nung Khristantem atema tensabo kasa dang, ajisüaka alima tesem kar nung tensa tamajungba akümba ajanga India jenjang ka ajema akümba dang, ta metetdaksü.

Meimchir temeden atema inyaker aser India nung yimsü temeden atema inyaker, Dr. John Dayal-i, "World Watch List ranking nung India jenjang ka ajema akümbaji India nung Khristantem atema tensa tajungba akümba ama mezüngshitsüla, ajisüaka tensa tamajungba dang akümer. Linük kar nung Khristantem atema tensa tamajungba akümba ajanga India jenjang ka ajema akümba dang," ta metetdaksü.

2024 küm October 1 nungi 2025 küm September 30 tashi

ANOGO ABEN TSÜNGREM DEN

Tashi akaba

"Ni Saul chuba kümdaktsüba atema ni temulung meyipier; kechiyong kü sülen manidaker, aser kü temelaba pai meinyak"(1 Sam. 15: 11).

Aseni amangba Tsüngremji ochishiba Tsüngrem lir. Tsüngremi kenübosa aseni bendenba mapa talang agütsütsü, aser ibaji kija dang masü saka linük ajak den inyaktsü. Kodang otsütemji reprangdir, asenoki kin laoba aser nokdakba angutsü. Kodang kin kati Tsüngrem nungi pilaa odir aser ochishiba, temeshiba nung melitetdir, Amalek kin dang inyakba ama (2,3) iba nungji o bendangba alitsü.

Sauli tashi mangaba asenoki ken bilemdangdi; chuba ka ama, pa nem lemozüktsüba mapa agi Tsüngrem tsüngdang tashi angaa koda alitsü tejangja lateta tuyu. Tsüngrem ozüng koba Samuel dang ashi, itemji Samueli Saul dang Tsüngremi ashiba angang ta bilemtetdaksü. Sakasa Sauli tanaben tashi mangaba nung alang. Oda mapaji tamajungba aotsü asoshi Sauli pei sasa asatetba shisa ajanga tashi manga. Koda aiben asen mapaji asatettsü shisa ajanga inyaker, tongtipangsa kodang asenoki alima lemanng den hai-haura mesüra jungteptsü merangdir, asen dangi lendong arur aser ibaji Tsüngrem tsüngdang tashi mangaba ajanga lir.

nung India nung Khristan 1,622 apu mesüra ken o mangadangi tepuokdak ayu.

Ano Evangelical Fellowship of India nung General Secretary, Rev. Vijayesh Lalia, "Evangelical Fellowship of India, Religious Liberty Commission [EFI-RLC]-i 2025 küm India nung Khristantem anema inyakba tatalokba 920 jangjaogo, aser ibaji küm ka kija nung Khristantem anema inyakba teimtiba lir," ta metetdaksü.

United Christian Forum (UCF)-ia 2024 küm India nung Khristantem anema inyakba tatalokba 834 jangjaa liasü. UCF National Coordinator A.C. Michael-i, tang tashi nungbo organization-i 2025 küm indang report mesangdong, ajisüaka March ita nung Parliament aliba mapang nung report sangdongtsü, ta metetdaksüogo.

WWL report ajangasa, India nung Khristan tetsürtem dak tim mesüi benshiba aser amokmerenba-a shilem 69 agi teimba kümogo aser kasa mapang nung yimsü dak sendakba nung Khristan 16 tepseta liasü, ta metetdaksü.

John Dayal-i, "2024-25 osangji melung anisüngzüktsüsa masü saka shisadangtsüsa lir. Linük tesem balala nung Khristantem amokmerener, anti conversion ozüng kübok tai tongloksür, tekülem tagidak mapang nung timtem agütsür aser loktiliba

nungi jendoker," ta ashi.

UCF nungi Michael-i, "UCF-i bushitetbaji ajanga tensa tamajungba akümba sayur. Khristantem anema inyakba tensa tamajungba kümogo, asalentong yanglur amakba aser tesempa o jembiba kanga bulua kümogo. Khristantem amaktsü nükjidong nung kuli meliaka 'tamangba yimsü meyipdaksür' ta tai tongloksüba kanga bulua kümogo," ta metetdaksü.

Tang tesüsa 2025 küm Rajasthan nunga anti-conversion ozüng benokogo. Tang India kübok state 12 nung anti conversion ozüng benoka lir.

Uttar Pradesh nunga anti conversion ozüng tasenba benokba sülen January 2025 nung mezüng Khristan ana-Jose aser Sheeja Pappachan na aija liasü. Apuani naji küm 5 tepuokdak ayutsü obendang agütsü aser Dalit nungertem rongnung inyakba atema senchi achi.

Tang alima nung Khristan million 388-ibo reshikangshi ajangshir, aser ibaji tesüba küm ka tsüngda million 8 bendenlokba lir.

World Watch List nung mezüngbuba jenjang nung North Korea lir, iba sülen jenjang 2buba nungi 12buba tashi nung aliba linüktemji Somalia, Yemen, Sudan, Eritrea, Syria, Nigeria, Pakistan, Libya, Iran, Afghanistan aser India linüktem lir.



Nüburtem Los Angelese, California nung Los Angeles City Hall jakdang rally ka nung shilem agiba noksa nung angur. U.S. Immigration and Customs Enforcement (ICE) ajanga enforcement raids aoba anema Honibarnü Southern California tesem balala nung nüburtemi longkak aita liasü.

Küm 7 sülen Venezuela nung US mission lapokshir

Caracas, Tsüklai/February 1 (TYO): Küm tenet sülen Venezuela yimtiba Caracas nung US diplomatic mission lapoktsü atema Venezuela dangi United States indang envoy iba linük tonga ogo.

Laura Dogu-i la Caracas tonga aoba osang Honibarnü X nung post ka ajanga metetdaksü aser ashiba agi, "ni aser ozü team mapa inyaktsü atema renema lir."

US nunger sepaitemi Venezuela tir Nicolas Maduro pur aoba sülen ita kashi lir tang iba jenjang ya agiogo. US tir Donald Trump-i tetuyuba agütsüba sülen Maduro ya Caracas nung tir kidang nungi pur oa liasü.

Iba sülen Maduro ya New York nung tepuokdak kati anirogo aser pa temesepba mozü shibelenba aser narcoterrorism conspiracy dak sendakba nung aitsür lir.

US-i iba jenjang agiba ya international temzüng ozüng alema inyaksangshiba lir ta shia aikati parnoki aija arudar.

Kasa mapang nung Venezuela indang Minister of Foreign Affairs Yvan Gil-i Telegram ajanga pai Dogu agizükogo, aser sensaksem ya linük ana bilateral tejangrabatem dak sendakba nung longjemmer inyaktsü atema lenmang mesapoka ayutsü, aser iba den ano tang mangatetep alibatem kati ka akümtsübutepba aser international temzüng ozüng dak ajemdaker sensaksem ajanga bentettsü merangsü, ta ashi.

Dogu, shiba taoba mapang Honduras aser Nicaragua dangi US ambassador liasü la Venezuela Affairs Unit charge d'affaires shilem agitsü atema shimogo, koba Bogota, Colombia nung US Embassy nung amendaker inyaksangshitsü.

Venezuela aser US na 2019 küm February ita diplomatic tesendaktep raksa liasü. Trump-i yimjak nung Venezuela nunger ozüng yanglur Juan Guaido pusemba sülen Maduro-i US den tesendaktep mayutsü

telemtetba agia liasü. Juan Guaido ya iba küm January ita linük interim tir küma liasü.

Minister of the Popular Power for Interior Diosdado Cabello, shiba Venezuela nung yimden yimsürtem rongnung tashi taittiba ka aser Maduro pusemba nisung ka lir pai January ita Caracas nung US embassy lapokba ajanga US-i pur or aliba tir dang koma benshidar aji jangjatsü atema Venezuela sorkar nem maongka agütsütsü, ta ashi.

Trump administration-i, security dak sendakba nung Maduro aputsü ya nüngdaka liasü ta shiaka ketdangsürtemi aikati, Venezuela indang totzü azüoktsü atema tejangraba aliba ajanga pa pur ao ta shia arudar. Venezuela nung ya alima nung totzü timtiba lir.

Maduro pur aoba sülen Trump-i Interim tir Delcy Rodriguez dang linük indang nationalised oil sector ya US indang firm tem nem lapoktsütsü asoshi nongshia arudar.

Linük ana tsüngda USD billion 2 alang Venezuela indang crude oil US dangi export asütsü asoshi tenangzüktepba ka yangluogo, aser Rodriguez-i Brehostibarnü reform bill ka nung sign süa ozüng kümdaktsüogo, aser iba ajanga privatisation taliba kümdaktsütsü asoshi lenmang lapoktsütsü.

Iba ozüng ajanga jurila firm tem nem Venezuela indang totzü ayoktsü aser produce asütsü asoshi lenmang lapoktsütsü, aser temzüng ozüng dak sendakba nung ken o tem Venezuela indang okakdak dang masü saka tanga okadaka o bendangtsü asoshi temelaba agütsüogo, koba bendanger company temi mapang talangka nungi aginüa aruogo.

Bendanger company temi ashiba agi, linük nung judicial inyakyim ya linük yimsü asüba socialist party-i amokbanger lir.

Iba bill yagisa sorkari bendenba royalty tem shilem 30 tashi nung cap sütsütsü.

Kasa anogo Trump administration-i ashiba agi, parnoki Venezuela indang oil sector nem tenokdangba agütsür alibatem salatsütsü aser iba ajanga linük sorkar aser state oil company PDVSA na nem tsütateptsü asoshi temelaba agütsütsü, koba export dak sendakba nung inyakyim aika atema nüngdaka liasü.

Trump-i ashiba agi, pai Venezuela indang commercial airspace lapoktsütsü asoshi tetuyuba agütsüogo aser Rodriguez dang US indang totzü company tem yakta Venezuela nung project tem inyaktsü asoshi asadangtsü atema arutsü ta osang agütsüogo.

Maneni Hokolbarnü Rodriguez-i, amnesty bill ka sangdongogo, koba linük nung tepuoker noklang aika chioktsü atema lir. Rodriguez-i ashiba agi, lai El Helicoide shimbangtsütsü, koba Caracas nung secret service tepuokdak ka lir. Iba tesem ya saisabong aser sobaliba riju ka kümdaktsütsü ta, laisa shisem.

Iba jenjang agiba ya Venezuela nung opposition-i akhangba tongtiban onüktem rongnung ka lir.

US-i Iran amaknungbo region nung rara tenzüktsü: Khamenei

Tehran, Tsüklai/February 01 (Agencies): Iran Supreme Leader Ali Khamenei-i United States dang par linük nung amaknungbo "regional war" tenzüktsü ta tekum dangtsü ashi, kong US Tir Donald Trump-i Middle East nung mitkar osettsüset bendenba mapang lir.

"Tan ya parnoki rara tenzüknungbo, aji regional war ka asütsü ta parnoki metettsüla," ta arishi küm 86 tain Khamenei-i Deobarnü Tehran nung sentong ka nung ashi, shibai küm 37 shi yimsü süa arur.

Ayatollah Ruhollah Khomeini France nung jenoka aliba 1979 küm Iran-i meyipa shilangba bilemtetba sentong ka nung pai iba o ya ashi. Ayatollah Ruhollah Khomeini meyipa shilangba ajanga Iranian Revolution tenzük aser Mohammad Reza Shah Pahlavi jena ao.


Iran nung January ita sorkar anema longkak aitdang nisung meyrirang aika tepsetba sülen USS Abraham Lincoln aircraft carrier, jet fighter aser navy destroyers tem region anasai aruba mapang Khamenei-i iba o ya jembia liasü.

Iran nunger sen tashi mait akumba mechi December ita tatemlen nungi longkak aitba ya tenzük, koba Khamenei yimsüsüba asoshi tetsükdaktsü akum.

Longkak aitba ya bendanger agents temi ajungmeso aser parnoki anir liasü ta Iran ketdangsürtemi ashir.

"Tawa sorkar anema nokdakba ya mitkar tashi amshia sorkar atsüngdokba den mesükteper. Mitkar tashi amshia sorkar atsüngdoktsü merangba nokdangtet," ta Khamenei-i Deobarnü ashi.

"Par nükjidong ya linük yimsü asüba nung shilem agiba centres tem samatsütsü liasü, aser iba yongji parnoki police, sorkar indang centres, [Islamic Revolutionary Guard Corps]



facilities, banks aser mosques amak aser Quran arong."

Longkak aitba mapang nisung 3,117 tepset aser yangji civilian aser security forces züngsem 2,427 lir ta Iranian state media ajanga ashi. Ajisüaka US nung amenoka aliba rights activists temi ashibabo nisung 6,000 dak tema tepset.

Linük tesem ajunga nung mepetmesü adokba sülen Trump-i Iran amaktsü aiben amokmerena arur.

US tiri mezüngbo longkak aiterkem tim yimya nung mamshiba mechi Tehran amaktsü ta ashi, saka tatsüka lir pai Iran nem nuclear deal ka mulunga agizükdaktsüner ta shia liasü.

June ita Iran aser American ketdangsürtem Oman nung dangar teyari nung jembishinüa liasü aser iba sülen Israel-i Iran nung anogo 12 rara. Israel den US aden aser parnoki Iran indang nuclear facilities amak.

Deobarnü Khamenei-i jembidang US-i Iran indang totzü aser natural gas densema ali rongsen rakzükner ta ashi.

Iba ama o jembiaika Iran aser US tsüngta rara madoktsü mechi tezüngzüktep kar yanglutsü meranga osangtsüsang agiteper ta ashir.

Iran indang Supreme National Security Council tekolak Ali Larijani-i US den jembishinü akatsü Tehran renema lir ta shir ghonda ishika lir Tehran ya Washington den temulung agüja jembitar ta Trump-i Honibarnü shia liasü.

Pakistan security forces-i Balochistan nung telungpur 92 tepset

Quetta, Tsüklai/February 01 (Agencies): Balochistan tesem balala nung amakba telangzüba agüja Pakistan security forces temi counter-operation agiba nung telungpur 92 tepset aser security personnel 15 asü, ta mitkar indang media wing Inter-Services Public Relations (ISPR) ajanga Honibarnü ashi.

Honibarnü menur sangdong ka ISPR ajanga agütsüba nung, telungpur temi Quetta, Mastung, Nushki, Dalbandin, Kharan, Panjgur, Tump, Gwadar aser Pasni densema tesem balala nung civilian aser security alidak amak.

Province nung nüburtem aser terenlok mapa nung

timtem agütsütsü nükjidong nung amak aser iba mapang tetsür, tanur aser teintet rogotem densema civilian 18 Gwadar aser Kharan district tem nung tepset, ta mitkari ashi.

Security forces aser ozüng amshiba agencies temi operations agiba mapang takum bendanga agütsür amaker asem densema telungpur 92 tepset aser operations ya tang tashi agitar, ta ashi.

Hokulbarnü Panjgur aser Harnai nung operations balaka agiba nunga telungpur 41 tepseta liasü ta ISPR ajanga ashir, anungji Balochistan nung anogo ana tsüngta telungpur 133 tepsetba alitsü, ta osang

ajanga ashi. Police aser Frontier Corps ajanga mapang shidak nung mera agiba mechi lendong aika raksatsü, ta Balochistan sorkar indang odongtar Shahid Rind-i ashi.

Ajisüaka Baloch Liberation Army (BLA)-ibo mitkari sangdongba ya tiazü ta ashir aser parnoki Operation Herof indang phase tanabuba kübok yimti 14 nung tesem 48 amak ta ashir.

BLA-i sangdong ka nung mitkar, administrative aser security structures nung tenük yoker amak aser iba mapang Pakistan security personnel aika tepset, aika apu aser posts aser sorkar indang ki o jen aika agi ta ashi.

Seniors Masters League asayamung osang



Raza Barua

Abhijit Saha

Thejaselhou

Dimapur, Tsüklai/February 1 (TYO): Tang asaya aliba Seniors Masters League nung Honibarnü Chumou-i toss akok aser mezüing field asütsü shim. Mezüing batting amenba sülen Esa Warriors puri over 20 nung asayar 8 out ser run 164 yanglu. Parnok rongnungi Raza-i run 52 yanglu aser Rakesh (48) o Pankaj (30) natia teyari agüja liasü.

Tanabuba innings nung Chumou Veterans puri over 18.2 nung asayar ajak out ser run 123 dang yangluteta parnoki asaya makok.

Esa team nungi bowler temi innings tepeyong batsmen tem nongshia asaya. Run 52 yangluba den wicket asem agiba atema Raza nem Man of the Match naroküm agüja liasü.

Tanabuba asaya nung Old Boys puri toss akok aser mezüing batting amentsü shimba

sülen parnoki over 20 nung asayar 4 out ser run 174 yanglu. Top order batter temi kanga junga asaya aser Abhijit Saha-i run 70 yanglu. Pa nem Meren Jamir (47), Anga Shuya (20), aser Suneper (15) nungeri teyari agüja liasü.

Run arishiba mapang Lhomithi SC nungi middle order temi kanga junga asaya-a tatemangbuba over tashi kanga meranga asaya. Parnok rongnungi Wapang Zong (55), Hamrung Langthasa (39), Tohoto Chisho (38), aser Hino Chishi (17) nunger kanga junga asaya saka takok mongutet.

Tatemangbuba over nung asaya akoktsü atema run 5 nüngdaka liasü saka Old Boys pacer Suneper-i pressure nung ball kanga junga ona Lhomithi nem run meyangludaktsüi parnoki asaya akok. Lhomithi SC-i over 20 nung asayar 4 out

ser run 169 dang yangluteta asaya tera agi dang makok.

Iba asaya nung Abhijit Saha nem Man of the Match naroküm agütsü.

Tasembuba asaya Nzon CC aser Kohima Legends na asayaba Legends puri wicket ti agi koka liasü.

Mezüing bat amentsü shimba sülen Nzon CC puri asayar 8 out ser run 125 yanglu. Parnok rongnungi Meshenti Apon-i run 38, Alo Kez-i run 30 aser Samuel Shohe-i run 18 yanglua liasü.

Tanabuba innings nung Kohima Legends puri asayar 2 out ser run 128 yanglua asaya kokogo. Parnok rongnungi opener Thejaselhou-i run 54 aser Viketho-i run 50 yanglua team jenjang junga toktsü.

Iba asaya atema Thejaselhou nem Man of the Match naroküm agütsü.

Devika-i Thailand Masters nung mezüingbuba Super 300 title ka benogo



Tsüklai/February 1, 2026 (Agencies): India tsür Devika Sihag-i Deobarnü Thailand Masters final nung Malaysia tsür Goh Jin Wei koka la indang career nung tang mezüingbuba Super 300 title ka benogo.

Arishi küm 20 tain Haryana tsürla yagi asaya 21-8, 6-3 agi koka aliba mapang world No. 68 Goh ya hamstring yiruba ajanga masayatetsüsa kuma anenatok aser iba ajanga Devika nem la indang career nung takok tulutiba agütsüogo.

Asaya ya tatemang mazü ka tembang, saka Sihag-i set anaprongla nung world No. 68 asayar ya amokbanger asaya

liasü.

Devika-i asaya kanga tashi ita tenzük aser la yakta dang 4-0 agi tejakdang aküm. Cross-court aser straight smash tajung aika malokja asayaba sülen India tsürla ya yakta dang 9-2 agi tejakdang aküm aser break tashi nung la 11-4 agi timba liasü.

Goh-i takok tashi meranga asaydang saka Devika-i tanen makai arakzüa asayaba aser kanga sangra asayaba ajanga la timtema liasü. Mezüingbuba game ya Devika-i amokbanger asaya aser lai asaya ayong ayonga akok.

Court melentepba sülen tanabuba game nunga Devika

yakta dang 6-3agi tejakdang aküm aser iba mapang tashi nungbo Goh-i la temang nung timtem aliba sayua liasü.

World No. 63 Devika ya Padukone-Draavid Centre for Sports Excellence, Bengaluru nung coach Umendra Rana kübok training agir, aser la Olympic medallist P. V. Sindhu den külemi la tasatem arangtetsüa arudar.

Devika international circuit nung tanem tanemi tejakdangi tudar. Devika-i la indang career nung mezüingbuba international title ya 2025 küm August ita Malaysia International nung akok aser iba sülen 2025 World University Games nung India mixed team-i bronze medal anguba nunga lai tongtimbang shilem agia liasü.

Iba masüadang la Indonesia Masters Super 100 nung runner-up liasü aser 2024 küm final pezü tonga asayaogo. Lai, Swedish Open aser Portugal International akok aser Estonian International nung tanabuba jenjang nung tembanga liasü.

PV Sindhu Badminton Asia Team Championship masayatsü

Tsüklai/February 1, 2026 (Agencies): Olympic medallist PV Sindhu taruba Badminton Asia Team Championships nung masayatsü telemetba agiogo, iba ajanga India team tashi meiti kümdaktsüogo. Badminton Asia Team Championships ya taruba hopta tenzüktsü.

Taoba küm October ita tetsüing yiruba sülen Sindhu asayshi tenzükogo, saka la temang nung timtem tilaka adokba ajanga Asia Team Championships nung masayatetsüsa kümogo ta source kati ashi.

Guwahati nung training camp mapang hamstring yiruba sülen la masayatetsüsa kümogo. La asayashi tenzükba sülen Malaysia Open semifinal tongogo, India Open mezüingbuba round nung tsük aser Indonesia Masters nung quarterfinals tonga asayaogo.

La masayatetsüsa akümiba ajanga India team takok angutsü kangabo timla makai kümogo. Iba asayamung ya February 3 nü Qingdao nung tenzüktsü. India tetsür team-i 2024 küm Malaysia nung asayaba mapangbo iba asayamung kokogo.

Taküm India team Group Y nung Thailand aser Myanmar den ata lir.

Sindhu masayaba mapang kija asaya nung world junior championships silver medallist Tanvi Sharma, Unnati Hooda, Rakshita Sree Santhosh Ramraj aser Malvika Bansod nunger asayatsü aser Commonwealth Games bronze medallists Gayatri Gopichand aser Treasa Jolly nati anir tarep asaya asayatsü. Squad nung Priya Konjengbam, Shruti Mishra aser Tanisha Crasto nungera densema lir.

Alcaraz-i mezüingbuba Australian Open kokogo



Tsüklai/February 1, 2026 (Agencies): Carlos Alcaraz-i Deobarnü Australian Open tebur kija asaya final koka otsü tasen ka yangluogo.

Melbourne nung Deobar aonung final asaya nung arishi küm 22 tain World No. 1 yagi set pezü asayaba sülen Novak Djokovic koka pa indang career nung tang mezüingbuba Australian Open title ka benogo.

Final asaya nung Spain nunger asayar yagi Grand Slam 24 koker aliba asayar tejen ya 2-6, 6-2, 6-3, 7-5 agi koka liasü.

Iba asayamung akokba sülen Alcaraz ya Grand Slam pezüprongla akokba asayar tanobusang kümogo. Iba record ya taoba mapang Rafael Nadal-i bener liasü.

Asayar anaprongla semifinal nung set pongungu asayar final atong, saka final asaya nung tenapronglai belemba temaitsü kecha mesayu.

Mezüingbuba set nung tenapronglai serve kanga junga otet pei service game akok. Iba

sülen game pongububa nung Djokovic-i Alcaraz indang serve break asü aser iba sülen nungi pai asaya amokbanger asaya-a mezüingbuba set kokatok.

Ajisüaka tanabuba set nung Spain nunger asayar yagi asendenshir kanga tashi ita asaya aser game tasembuba nung Djokovic indang service break asü aser minute 35 nung dang asaya ya 6-2 agi kokatok.

Tasembuba set ya game trokbuba tashi kanga toktepba asaya, saka iba sülen Alcaraz-i Djokovic indang serve break asü aser asaya ya 6-3 agi akok.

Set pezübuba nungbo Djokovic belematoker ama reprangtet, saka pai maneni metoktsüi asaya aser mezüingbuba game Spain nunger asayar yagi break asütsü aliba nokdang.

Iba sülen tena game kaka melentepa kokyonga atu aser 5-5 ta game kasasa koker aliba mapang Alcaraz-i Djokovic indang serve break süa pai asaya koka liasü.

BILEMDANGANG

"Anema alitsü asoshi arakzüa alitsü kanga tongtimbang."